

D Hoe. Es ist gewiß/ wann zwei Partheyen eine Streitsach pag. 9.
miteinander haben / vnd ein Theil den andern aufffordert / so ist in
der ganzen Welt gebräuchlich / daß jeglicher Theil weiß / mit weme
er zuthun habe / so es anders ehrlich / vnd nit tückisch / zugehen soll.

Respons. Gleichwol ist es auch gebräuchlich / daß wann heutiges Ta-
ges jr zweene oder mehr eine Rechtsachen haben / vnd ein Urtheil holen las-
sen: sie etwa den namen Titij, Sempronij, vnd dergleichen führen / da dan die
Juristen vnd Richter nit nach den Namen fragen: sondern in betrachtung
der Sachen selbst vnd angeführter grunde / den Ausspruch thun. Vorzeiten
die Areopagitæ zu Athen haben bey enteler Nacht Gericht gehalten / vnd
die Sachen ohne der Partheyen benennung / entscheiden müssen / damit sie
ohne alles ansehen der Personen haben handeln mögen. Zu dem / so weiß ja
der Doctor mit wem er zuthun habe: nemlich mit einem der der reformir-
ten Religion vnd Kirchen zugehan ist. Was wird ihn dan der außgetrus-
te Name groß helfen oder auch hindern?

Mosis Widersacher sindt zum theil mit Namen bekandt gewesen / als pag. 9.
Iannes vnd Iambres 2. Tim. 3. v. 8. Vnd also sind auch des Doctoris anta-
gonistæ zum theil bekandt: als D. Paulus Tossanus, Iohan. Cratius Dan-
tisc. vñ andere. Wiewol wir diese vnserige mit Mosis Widersachern nit ver-
gleichen. Wir reden nur ex hypothesi Doctoris. Item Mosis Widersacher /
die ihm widerstanden / sind zum theil vnbekandt vnd nit genennet: als Exod.
16. v. 2. 3 Exod. 17. v. 3. Num. 16. v. 2. 3 Psal. 106. v. 16. vnd anderswo. In
welchem Fall wir also hergegen wider den Doctor schliessen können / doch al-
so / daß wir ihn weder mit Mose, noch die vnserigen / mit Mosis Widersachern
vergleichen. Wir reden nur ex ipsius premissa hypothesi. Sonst wissen wir /
daß auch Moses heimlich vngenant vnd vnbekant einen Ägypter erschla-
gen hat. Exod. 2.

D Hoe: Elias wuste auch / wer seine Widersacher waren / die pag. 9
Baaliten.

Respons. Aber es ist widerumb eine Ungleichheit. Die vnserere sindt
keine Baaliten: für eins. Zum andern also gesezet: so weiß der Doctor,
daß die vnserere sind Reformirten, mit denen er zuthun hat. In dem Stück
were eine Gleichheit der Exempel. 1. Regum. 18. Ein gleiches Urtheil ist
auch zu seken vber Goliath 1. Samuel. 17. vnd Hananiae Ieremiae 28. vnd
Paschurs Exempel Ieremiae. 20. Dann vnserere mit Goliath, oder mit
Hanania oder Paschur nicht zu vergleichen sindt.

Goliath war ein Hende vnd sprach dem Zeug Israel Hohn: wir sindt
B ij Christen